

**MAYAN DEN CAS DI CULTURA....**  
**INTERES ENORME PA CONCIERTO BEK NA MI RAIZNAN DI EDJEAN...**



\*\* Tur cos practicamente ta cla pa e concierto tan espera di e popular joven cantante Edjean Semeleer, kende mayan anochi lo bai presenta den Cas di Cultura su concierto 'Bek Na Mi Raiznan'. Esaki ta di 10 concierto cu Edjean Semeleer ta bai presenta. Pueblo di Aruba a custuma cu e conciertonan di Edjean ta specialmente durante temporada di fin di aña y tambe riba Dia di Mama, pero e biaha aki Edjean a escohe e fecha di 2 di Oktober pa asina celebra su di 15 aña den e mundo di Farandula. Pa e ocasion aki Edjean a invita e tres cantantenan legandario Arubano, Dhaddy Brokke, Edwin Abath y Jossy Brokke Jr,

kendenan lo presenta algun di nan exitonan grandi. Edjean a duna Den Ambiente di conoce cu e motibo cu el a escohe e tres cantantenan aki, ta pa honra nan como artistanan cu tin hopi aña di trayectoria y respeta den comunidad. Pa loke ta trata e show mes di Edjean, ela duna di conoce cu e lo bai repasa su exitonan durante su 15 aña den Farandula. Ta trata aki di un concierto di tres hora largo, den cual conhuntamente cu su tres invitadonan special, sin duda algun lo bai trece grato recuerdonan den Cas di Cultura. Edjean a cuminsa canta cu su 10 aña y su prome cancion "Respeta Mi" a resulta den un exito rotundo.



Como un mucha di apenas 10 aña, Edjean a sa di conquista curasonan di un tur na tur caminda cu el a yega di presenta. Pa varios conciertonan grandi, Edjean tabata e artista invita. Manera entre otro: Pedro Fernandes den Tropicana Showroom, Mariachi Vargas den Tropicana showroom y tambe duo cu Boy Thode y Tony Sherman. Den tur su nueve conciertonan, Edjean a goza di un sold out y ta spera cu pa mayan su di 10 concierto cual ta su celebracion di 15 aña den Farandula sin duda lo bai ta den un broche de oro. Ticketnan ta obtenibel na CD & More of por yama 5633333..



**\*\* E cd aki ta graba na 1995, cual a resulta como e prome CD den Caribe presenta pa un cantante infantil...**

